

ZAPISNIK

SA V REDOVNE SJEDNICE IZVRŠNOG ODBORA UPFBIH

održane dana 19.11.2019. godine u prostorijama UPFBIH u Sarajevu

Sjednici su prisustvovali članovi IO.: Adnan Smailbegović, Safudin Čengić, Salihović N. (po ovlaštenju Krasnodara Petrovića), Snježana Kopruner i Alija Čolaković (po ovlaštenju Nurdina Peštalića).

Sjednici nisu prisustvovali članovi I.O.: Rusmir Hrvić i Marin Raspudić koji su opravdali svoj izostanak.

Ispred UP FBiH: Mladen Pandurević i Mersiha Jusić.

Predsjedavajući Izvršnog odbora Adnan Smailbegović je predložio sljedeći:

DNEVNI RED

1. Usvajanje Zapisnika sa IV redovne sjednice Izvršnog odbora UPFBiH;
2. Razmatranje Sporazuma o Ekonomsko socijalnom vijeću;
3. Razmatranje i usvajanje prijedloga mjera i aktivnosti UPFBiH za izradu Strategije razvoja FBiH 2021-2027;
4. Razmatranje inicijativa UPFBiH za izmjene i dopune:
 - a) Zakona o poreznoj upravi FBiH
 - b) Zakona o porezu na dobit
 - c) Zakona o stvarnim pravima
5. Razmatranje Uredbe o proizvodima koji poslije upotrebe postaju posebne kategorije otpada i kriterijima za obračun i način plaćanja naknada;
6. Razmatranje Uredbe o naknadama za plastične kese;
7. Razmatranje Uputstva o dostavljanju podataka iz knjigovodstvenih evidencija elektronskim putem;
8. Informacija sa sastanka održanog sa predstavnicima Federalnog zavoda za statistiku;
9. Informacija o pokretanju krivične prijave protiv UO UIO;
10. Tekuća pitanja.
 - Održavanje sastanaka rukovodstva Unije poslodavaca RS I UPFBiH najmanje 2 puta godišnje

Dnevni red je jednoglasno usvojen u predloženom obliku.

RASPRAVLJANJE PO TAČKAMA DNEVNOG REDA:

Tačka 1. Usvajanje zapisnika sa IV vanredne sjednice IO

Predsjednik Izvršnog odbora Adnan Smailbegović je upoznao članove Izvršnog odbora sa ovom tačkom dnevnog reda. Napomenuo je da je Zapisnik dostavljen svima, te da po istom nije bilo primjedbi.

Obzirom da nije bilo primjedbi donesen je sljedeći zaključak:

A.D. 1.1. Zapisnik sa IV vanredne sjednice IO je jednoglasno usvojen.

Tačka 2. Razmatranje Sporazuma o Ekonomsko socijalnom vijeću;

Predsjednik IO je upoznao prisutne daje cilj Sporazuma da se nakon dvije godine blokade tokom kojih nisu održavane sjednice, konačno obnovi rad ovog tijela. Imajući u vidu značaj socijalnog dijaloga kao i činjenicu da će se potpisivanjem Sporazuma o ESV-u nastaviti rad Ekonomsko socijalnog vijeća izvršni odbor je podržao potpisivanje.

A.D. 2.1. Izvršni odbor je podržao prijedlog Sporazuma. Daje se ovlaštenje predsjedniku UO Adnanu Smailbegoviću da u ime UPFBiH potpiše Sporazum.

Tačka 2. Razmatranje i usvajanje prijedloga mjera i aktivnosti UPFBiH za izradu Strategije razvoja FBiH 2021-2027;

Direktor UPFBiH Mladen Pandurević izvjestio je članove da Udruženje ima svog predstavnika u Koordinacionom odboru za izradu Strategije razvoja FBiH 2021-2027, te 12 predstavnika u podgrupama Strategije. Također je istakao da je Udruženje pripremio generalni stav za izradu Strategije. Vizija Udruženja na kojoj se bazira stav jeste da BiH bude među 20 najstimulativnijih zemalja za investiranje u Europi. Uzimajući u obzir nepovoljan privredni ambijent, nisku stopu ekonomskog rasta, visoko opterećenje cijene rada, rast javne potrošnje, odliv radno sposobnog stanovništva i komplikovane administrativne procedure nužno je izvršiti sveobuhvatne reforme zakonskih okvira u cilju rasterećenja privrede. Ekonomski razvoj je jedan od strateških ciljeva Razvojne strategije FBiH 2021-2027. koji se u suštini svodi na kreiranje stimulatnog poslovnog ambijenta radi privlačenja domaćih i stranih investicija, i rasta BDP-a, ličnog dohotka, štednje, potrošnje i javnih prihoda. Kako bi se realizirao ovaj strateški cilj urgentno se mora smanjiti opterećenje cijene rada putem smanjenja doprinosa na platu, koje je među najvišima u Europi, a s druge strane neophodno je ravnomjerno raspodijeliti poresko opterećenje svih kategorija društva kako bi se povećala naplata javnih prihoda. Tim mjerama bi se istovremeno smanjila siva ekonomija koja je jedan od inhibitora unapređenja poslovne klime u zemlji.

Članovima IO je dostavljen prijedlog mjera i aktivnosti UPFBiH za izradu Strategije razvoja FBiH 2021-2027 o kojima se trebaju izjasniti.

Nakon diskusije donesen je sljedeći zaključak:

A.D. 3.1. Izvršni odbor je podržao prijedlog mjera i aktivnosti UPFBiH za izradu Strategije koja će biti dostavljena predstavnicima UPFBiH koji su članovi Radne grupe za izradu Strategije.

Tačka 4. Razmatranje inicijativa UPFBiH za izmjene i dopune:

- Zakona o poreznoj upravi FBiH
- Zakona o porezu na dobit

Direktor Pandurević je upoznao prisutne sa ovom tačkom dnevnog reda u i ukratko prezentirao inicijative za izmjene navedenih zakona. Inicijativom za Izmjenu zakona o poreznoj upravi FBiH predloženo je uvođenje apsolutnog roka zastare za razrez i naplatu poreza jer to nije propisano postojećim zakonom, što znači da porez ne zastarijeva i da porezna tijela mogu postupati uvijek i po vlastitoj volji. S tim u vezi Udruženje je predložilo apsolutni rok zastare koji je 10 godina.

Inicijativom za Izmjene zakona o porezu na dobit predložene su izmjene odredbi kojim bi se regulisao porezni tretman amortizacije sredstava koja će se primjenom MSFI 16 naći u knjigama najmoprimca. Naime, od 01. januara 2019. godine u FBiH je u obaveznoj primjeni novi računovodstveni standard, MFSI 16 - "Najmovi", čijim stupanjem na snagu je nestala razlika između priznavanja finansijskog i operativnog najma kod najmoprimca. Uvođenjem novog Standarda, sredstva uzeta pod operativnim najmom kod najmoprimca više neće imati tretman troška već stalnog sredstva. Tim će se predmet najma naći u bilansu stanja kod najmodavca i najmoprimca istovremeno.

Imajući u vidu trenutne odredbe Zakona o porezu na dobit, amortizacija je priznat trošak isključivo ukoliko se radi o sredstvima u vlasništvu poreznog obveznika. S tim u vezi, Udruženje je predložilo da izmjena člana 19 stav 3. zakona o porezu na dobit bude upućena po hitnoj proceduri. Kao rezultat ove inicijative porezni obveznici bi blagovremeno (prije februara 2020. godine) dobili zakonski osnov za pravilan porezni tretman novonastalog troška amortizacije i kamate, koji su nastali primjenom MSFI 16, odnosno imali bi manji iznos porezno nepriznatih troškova.

Nakon diskusije donesen je sljedeći zaključak:

A.D. 4.1. Izvršni odbor je usvojio Inicijativu za izmjenu Zakona o poreznoj upravi koja će biti upućena Ministarstvu finansija i premijeru Vlade FBiH sa zahtjevom da se uputi u usvajanje poskraćenoj proceduri.

A.D. 4.2. Izvršni odbor je usvojio Inicijativa za izmjene Zakona o porezu na dobit koja će biti upućena Ministarstvu finansija i premijeru Vlade FBiH sa zahtjevom da se uputi u usvajanje po hitnoj proceduri.

Tačka 5. Razmatranje Uredbe o proizvodima koji poslije upotrebe postaju posebne kategorije otpada i kriterijima za obračun i način plaćanja naknada;

Tačka 6. Razmatranje Uredbe o naknadama za plastične kese;

Izvršni odbor je zajedno razmatrao tačku 5 i tačku 6 imajući u vidu da se radi o Uredbama za koje je nadležno Ministarstvo turizma i okoliša a koje su vezane za Zakon o upravljanju otpadom.

Direktor je upoznao članove IO o Uredbi o proizvodima koji poslije upotrebe postaju posebne kategorije otpada i kriterijima za obračun i način plaćanja naknada i Uredbi o naknadama za plastične kese kojim se poslodavci obavezuju na plaćanje nove naknade. Napomenuo je da o udredbama nisu obavljene konsultacije sa predstavnicima poslodavaca.

Nakon diskusije donesen je sljedeći zaključak:

A.D. 5.1. Izvršni odbor je zauzeo stav da se premijeru Vlade FBiH i nadležnom ministarstvu uputi zahtjev da se tekstovi predloženih Uredbi ne usvajaju u predloženom obliku, prije nego što se obave konsultacije sa predstavnicima Udruženja poslodavaca FBiH, te razmotre dobre prakse zemalja u okruženju i u EU.

A.D. 6.1. Zadužuje se stručna služba UPFBiH da pripremi primjedbe na obje uredbe koje će biti dostavljene Premijeru Vlade FBiH, nadležnom ministarstvu I ESV-u.

Tačka 7. Razmatranje Uputstva o dostavljanju podataka iz knjigovodstvenih evidencija elektronskim putem;

Vezano za tačku dnevnog reda o razmatranju Uputstva o dostavljanju podataka iz knjigovodstvenih evidencija elektronskim putem direktor UPFBiH je istakao da je Udruženje svojim članicama dostavilo Nacrt uputstva koje je objavila Uprava za indirektno oporezivanje, te je zatraženo izjašnjavanje i dostavljanje primjedbi. Nakon toga, Nacrt Uputstva je razmatran na sjednici Ekonomskog i Pravnog savjeta te je, u skladu sa zaključcima ovih tijela, sačinjen i upućen dopis Upravi za indirektno oporezivanje u kojem je ukazano na nedostatke koji su uočeni u Nacrtu. U dopisu je Udruženje zatražilo tumačenje jedne odredbe Uputstva, kako bi se izbjegla različitih tumačenja od strane inspekcija i kako se poslodavcima ne bi nanosila šteta kada Uputstvo stupi na snagu. Također, upozoreno je na odredbe koje su u suprotnosti sa postojećim Pravilnikom o primjeni Zakona o PDV-u i na potrebu njihovog usklađivanja.

A.D. 7.1. Izvršni odbor je usvojio primjedbe na Uputstvo o dostavljanju podataka iz knjigovodstvenih evidencija elektronskim putem.

Tačka 8. Informacija sa sastanka održanog sa predstavnicima Federalnog zavoda za statistiku;

U okviru ove tačke članovi su informisani i sa zaključcima sastanka održanog sa predstavnicima Federalnog zavoda za statistiku koji je iniciran zbog problema sa kojima se susreću kompanije u vezi sa dostavljanjem raznih formi statističkih obrazaca na federalnom, kantonalnom i lokalnom

nivou, kao i Centralnoj banci BiH. Zaključeno je da je potrebno formirati stručne timove u kojima će predstavnici UP FBiH i Federalnog zavoda za statistiku zajednički raditi na pojednostavljenju procedura prikupljanja statističkih podataka.

U cilju rješavanja navedenih problema predloženo je da se ispred UPFBiH imenuju predstavnici u stručni tim koji je formiran od strane FZS a koji će analizirati podatke i raditi na izmjenama i poboljšanju.

Nakon diskusije donesen je sljedeći zaključak:

A.D. 8.1. Izvršni odbor je donio Odluku kojom se ispred UPFBiH u stručni tim FZS imenuju:

1. Sadeta Filipović Abduzaimović, Ataco d.o.o.
2. Minela Češko, A2B EXPRESS DELIVERY d.o.o.
3. Jedan predstavnik iz Elektroprivrede BiH
4. Jasmina Kurspahić, pravica UP FBiH

Tačka 9. Informacija o pokretanju krivične prijave protiv UO UIO;

Direktor je upozano prisutne da je UPFBiH u skladu sa Odlukom Upravnog odbora pripremio i tužilaštvu uputilo krivičnu prijavu protiv članova UO UIO

A.D. 9.1. Članovi Izvršnog odbora upoznati sa sadržajem krivične prijave i primili k znanju informaciju.

Tačka 10. Tekuća pitanja.

Pod tekućim pitanjima članovi su raspravljali:

- o održavanju sastanaka rukovodstva Unije poslodavaca RS i UPFBiH.

Nakon diskusije donešen je sljedeći zaključak:

A.D. 10.1. Izvršni odbor je donio Odluku o potrebi održavanja redovnih sastanaka, najmanje dva do tri puta godišnje, s ciljem unaprjeđenja saradnje entitetskih udruženja koja zajednički trebaju da djeluju na nivou BiH i raditi na poboljšanju poslovnog ambijenta na nivou BiH.

Sastanci bi se održavali naizmjenično, jedan u FBiH, jedan u RS-u, a razgovaralo bi se o aktivnostima i inicijativama oba udruženja, iskustvima i jačanju zajedničke saradnje.